

## 2012年4月21日立法會福利事務委員會 關注長者權益大聯盟長者講稿

主席、各位議員、各位嘉賓：

好多謝有機會喺度，從老人家現身處境，講吓退休情況！

我地一到60歲，已經冇乜可能搵到嘢做，就算有，都係一D做多幾年人工低，時數高嘅清潔、大廈管理員嘅工作，甚至係一D執紙皮或鋁罐等嘅自僱人士，以依家平均年齡到80歲嚟計，即係有十幾年靠自己積蓄、下一代嘅支持或者政府嘅幫助。

首先講吓下一代嘅支持方面：以現時嘅經濟情況，D仔女可以自給自足已經於願足矣，交租、兩餐、養佢地嘅仔女，讀書加興趣班，份糧都用得八八九九，仲要儲下錢，我地點能奢望佢地仲有餘錢養我地。

如想靠自己積蓄，真係妙想天開，果陣時D人工得雞碎咁少，亦都無強積金或者退休金，就算有D錢儲到落嚟，到今時今日都所剩無幾，嗰時D嘢可能好平，都話可以慳D，食少D。但依家D嘢就貴到飛起，就快連食都無得食。

可以嘅話，我地都好唔想攞綜援，因為綜援係一個置長者尊嚴於不顧嘅制度，但係，事實係。。。

- 1 · 香港60歲以上人士冇任何形式退休保障有多過80萬人(83.3%)
- 2 · 有3成2嘅長者居於貧窮家庭
- 3 · 超過3成8(38%)嘅長者月入少於\$2000
- 4 · 長者綜援個案數目持續上升，

簡單D講，即係人又老、錢又無，政府照顧又唔好，退休、醫療都唔週到，忽視長者昔日嘅辛勞及香港的貢獻。

我地希望香港，可持續繁榮，可持續安定；每個香港人有責任為繁榮安定而努力，亦同樣有權利去享受和擁有呢個成果。所以，長者有權有尊嚴地享受退休生活，所以，政府應實施；

可持續

全民性

即時性

隔代供養

全民保障

足夠生活水平嘅「全民退休保障」政策

為此，我們有以下嘅意見：

- (一) 長遠而言，政府應設立「全民退休保障」，使長者能尊嚴地生活；
- (二) 65歲開始，即時可領取豁免審查的生果金。